

Peluasan (2010–2015)

Meluaskan Peranan, Meningkatkan Perlindungan

Dengan asas yang kukuh, kami bersedia mengambil peranan yang lebih luas dengan impak yang lebih mendalam. Tempoh 2010 hingga 2015 ditanda dengan perkembangan mandat, tanggungjawab pengurusan krisis yang lebih besar, serta pengiktirafan antarabangsa yang semakin meningkat buat kami.

Satu pencapaian penting pada tempoh ini adalah kejayaan kami untuk keluar daripada Skim Jaminan Deposit Kerajaan (Government Deposit Guarantee – GDG) yang diperkenalkan pada 2008 ketika krisis kewangan global. Walaupun jaminan menyeluruh GDG telah menstabilkan keyakinan pasaran, penarikannya menandakan kembalinya perlindungan yang lebih berdisiplin dan mampan. Peralihan ini turut disertai dengan peningkatan ketara dalam rangka kerja perlindungan kami – had perlindungan DIS dinaikkan daripada RM60,000 kepada RM250,000, serta pengenalan Sistem Perlindungan Manfaat Takaful dan Insurans (TIPS), yang meluaskan perlindungan kepada pemilik sijil takaful dan polisi insurans yang layak.

Pada tahun 2013, kemantapan institusi dan keberkesanan operasi PIDM diiktiraf melalui rogram Penilaian Sektor Kewangan (Financial Sector Assessment Program – FSAP) oleh institusi kewangan antarabangsa. Penilaian ini mengesahkan tahap pematuhan luas kami terhadap Core Principles for Effective Deposit Insurance Systems yang dikeluarkan oleh International Association of Deposit Insurers (IADI). Keputusan ini mencerminkan komitmen kami terhadap standard antarabangsa serta amalan tadbir urus yang baik.



Dari segi kesediaan krisis, kami melaksanakan latihan simulasi krisis pertama dan membangunkan rangka kerja Intervensi dan Resolusi Kegagalan (Intervention and Failure Resolution – IFR), yang menjadi asas kepada rejim resolusi efektif di Malaysia. Sistem pembayaran balik bersepadu turut diperkenalkan bagi memastikan pendeposit mendapat akses segera kepada wang mereka sekiranya berlaku kegagalan dan penutupan bank. Langkah proaktif ini meningkatkan keupayaan kami mengurus penutupan institusi kewangan yang tidak berdaya maju dengan teratur, sambil meminimumkan gangguan sistemik.

Selain pencapaian teknikal, PIDM memperkukuhkan komitmen terhadap ketelusan dan penglibatan pihak berkepentingan. Melalui siri jelajah nasional, taklimat komuniti, serta kempen pendidikan awam bersasar, kami mempertingkatkan kefahaman masyarakat mengenai perlindungan deposit dan peranan PIDM sebagai pihak berkuasa perlindungan konsumen kewangan. Inisiatif ini penting dalam membina kepercayaan, membetulkan tanggapan salah dan memastikan konsumen kewangan merentas pelbagai segmen memiliki pengetahuan dan keyakinan.

Kami juga memperkukuhkan hubungan global dengan bertukar pengetahuan dan amalan terbaik bersama rakan sejawat antarabangsa. Menjelang 2015, PIDM muncul sebagai sebuah pihak berkuasa yang diyakini, ditadbir dengan baik, serta bersedia untuk melangkah ke fasa seterusnya.